

# En in onn vegn fatg festa

## Uniun grischuna dals veterans da tir

■ (fmr/gns) **Da la partida a la 99avla radunanza generala da l'uniun a Domat èn stads preschents 190 veterans. Undrà è vegni il quartet da veterans ch'ha gudagnà la concorrenza dals chantuns tar il Tir federal da veterans 2019 a Turitg. Il 2021 dastga l'uniun festivar ses giubileum da 100 onns.** Dapì onns èsi tradiziun che l'Uniun grischuna dals veterans da tir salva sia radunanza generala a Domat en la «Cantina Biella» da la EMS-Chemia a Domat. 190 veterans e numerus giasts da la politica han chattà la via a Domat per assister a la radunanza generala. President da l'uniun cun 760 commembers è dapi in onn *Max Buchli*, el che stat a Malans ed è uriund da la Val Stussavgia. En ses pled ha el supplitgà ils preschents da far attent amis ed enconuschents tiradurs da daventar commembers da l'uniun. Avant diesch onns aveva quella anc var 860 commembers, gist 100 dapli ch'actualmain. L'onn passà hajan 25 veterans gi da bandunar quest mund, uschia che lur circul da tir saja per adina sa serrà. Sa regurdads èn ils preschents lura er dal president d'onur da l'uniun, *Plazi Giuseppe Cadruvi*, el ch'è mort l'emna passada cun passa 90 onns.

### «Dapli toleranza envers il sport da tir»

Tranter ils numerus giasts eran er *Alessandro Della Vedova*, il president dal Cussegl grond e cusseglier guvernativ *Marcus Caduff*. Il president dal Parlament grischun ha cunzunt fatg attent a la funcziun impurtanta da las uniuns da tir

areguard l'indipendenza da la Svizra, al diever d'in'arma ed a la disciplina che mintga tiradur haja cun quella.

Mintga uniun da tir saja lura er da gronda valur per la cuminanza, la societad e per l'amicizia. *Caduff*, el ch'è stà president dal comité d'organisaziun da la Festa chantunala da tir 2018 en Surselva, el giavischass in pau dapli toleranza envers il sport da tir. Sajettar saja in sport e na be ina chausa che fetschia canera e chaschunia ramurs.

Il sport da tir saja ina passiu per tgiarar la cumpagnia, per promover l'attaschadad ed il spiert da cuminanza. Tir uneschia vegl e giuven, la chompagna e las citads, ha punctuà il cusseglier guvernativ lumnezian.

### Uniuns èn in gudogn per mintga lieu

*Silvia Bisculm Jörg*, ella ha represchentà la vischnanca da Domat. La suprastanta da quel lieu ha ditg che Domat haja uniuns cun ina gronda tradiziun e tar ina da quella tutgia er l'uniun da tir. Per mintga vischnanca sajan las uniuns in gudogn ed in enrigiment. La dunna ha lura er menziunà la lavur voluntaria che vegn prestada en las uniuns e quella lavur saja da respectar. *Martin Bühler*, il manader da l'Uffizi dal militar e da la protezzion civila ha accentuà ch'el avessia gugent in pau dapli acceptanza envers il sajettar ed envers quel sport.

La culminaziun da la Festa federala da tir dals veterans 2019 a Turitg è stà il tir dals chantuns. Quell'occurrèza è adina

suttascritta da blera tensiun. Las ambiziuns da las delegaziuns chantunals èn adina fitg grondas, uschia er tar la delegaziun grischuna. Sajettà fitg precis han cunzunt ils quatter tiradurs *Kaspar Hartmann* (Aschera), *Peter Färber* (Favugn), *Plazi Giuseppe Cadruvi* (Laax) ed *Arno Theus* (Favugn). Els han tratg cun l'arma da sport lur program e gudagnà la concorrenza dals chantuns.

Fatg han ils Grischuns 777 puncts, tschintg dapli ch'è il quartet dal Vallais. Il terz plaz han cuntanschi ils quatter veterans da Berna cun in total da 770 puncts. A Domat è il quartet grischun vegnì undrà per quel success grondius a Turitg, l'occurrèza cun passa 700 veterans e da quels 300 dal Grischun.

### In stetg da giubileum

Ils affars statutarics, quels n'han chaschunà naginas discussiuns. La contribuziun annuala, quella resta sco fin ussa sin 25 francs per commember. Confermads èn vegnids l'actuar *Vital Lutz* (Cuira) ed il cassier *Jürg Gabathuler*. Il 2021 dastga l'uniun festivar ses giubileum da 100 onns. Quel giubileum vegn festivà cun in stetg da giubileum che vegn sajettà a chaschun dal tir annual ch'ha lieu en il decurs da la stad a Tusaun. A Domat èn lura er vegnids undrads 19 tiradurs ed ina tiradura cun esser dapli che 60 onns actives.

Da nov èn tuts commembers d'onur da l'Uniun grischuna dals veterans da tir. Tranter ils undrads sa chattan er diesch umens dad 80 onns che derivan da regiuns rumantschas dal Grischun.



Il quartet grischun ch'ha gi success a Turitg tar il Tir federal da veterans: *Peter Färber*, *Kaspar Hartmann*, *Plazi Giuseppe Cadruvi* ed *Arno Theus* (da san.).